

# 500 komuniti Penan deka dibekal enggau kuasa solar **UNIMAS, Jipun bekerejasama ngemajuka Kuasa Hidro Elektrik, Long Lamai**

**KOTA SAMARAHAN:** Perintah Jipun meri geran tambah unguks RM350,000 ngagai Universiti Malaysia Sarawak (UNIMAS) kena ngaga projek Kuasa Hidro Elektrik di Long Lamai, Ulu Baram.

Sapit Canselor UNIMAS Profesor Datuk Dr Khairuddin Abd Hamid madahka projek nya deka meri penguntung ngagai komuniti Long Lamai dalam Bagi Menua Miri ke semak garis entara menua enggau Indonesia kena nyungkak tikas kualiti pengidup sida di pelilih menua nya.

Iya mega madahka projek nya deka dikereja Institut Maklumat Sosial dan Teknologi Inovasi (ISITI-CoERI), UNIMAS.

"Perintah Jipun meri geran wang tambah kena nulung bejalaika sekeda projek di menua ke benung mansang nengah Bantu Geran Projek Pengelikan Pendiaua Mensia Mayuh Menua Pesisir (GGP).

"Bantu tu diberi kena nyukung pengawa ngemansang-ka projek ke diatur Gerempung

Ukai Perintah (NGO), hospital, sekula, pusat pemelatih vokasional enggau ke bukai," ku iya bejaku ba Pengerami Nyain Geran Kontrak Antara Perintah Jipun enggau UNIMAS di UNIMAS ditu.

Pengerami nyain Geran Kontrak nya disain ulih Menteri sereta Sapit Tuai Mision Opis Perintah Jipun di Malaysia Koici Ito lalu Datuk Dr Khairuddin Abd Hamid nyain surat janji nya ngarika UNIMAS.

Iya madahka, kenau ari taun 1996 nengah GGP Perintah Menua Jipun telah udah ngemendarka tulung unguks RM2.4 juta semua nya bantu kena meri tulung kena nyungkak tikas pengidup rayat ke diau di menua pesisir di negeri tu.

Kharuddin madahka, ngena Kuasa Hidro Elektrik nya kira 500 buah komuniti Penan di Long Lamai deka disambung enggau bekal kuasa solar ke dijangka deka mai ubah besai ngagai chara pengidup raban bansa Penan.

"Kitai arapka nengah projek tu pengawa pansik dalam program pelajar UNIMAS deka dikelala sereta ditemu enggau lebih tebilang agi," ku iya.

Ba penerang iya, Koici Ito madahka perintah Jipun endang bisi tanggungjawab nulung menua ke benung mansang kena nyungkak tikas pengidup rayat menua tu.

"Bantu bakanya diteruska lalu begunaka tulung ari menua tu sereta enggau orang ke bisi kait enggau pengawa nya,"ku iya

Nitihka iya, perintah Jipun ngarapka projek tu ila ulih mai ubah ngagai pendiaua rayat bekelingi enggau Long Lamai nya.

#### **BETUKAR DOKUMEN...**

Profesor Datuk Dr Khairuddin Abd Hamid (kiba) betukar dokumen enggau Koici Ito (kanan) dalam Pengerami Nyain Geran Kontrak Projek Kuasa Hidro Elektrik di Long Lamai, Ulu Baram di UNIMAS Kota Samarahan.

